



Inatsisartuni ilaasortaq Sofia Geisler, Inuit Ataqtigiit
/maani

Ilulissani mittarfik pillugu § 37 naapertorlugu apeqquteqaammut 2019-246-imut akissut

23-07-2019
Suliaq nr.: 2019 - 16257
Id nr. 42827837

Asasara Sofia Geisler

Inatsisartut suleriaasianni § 37 naapertorlugu Ilulissani mittarfik pillugu Naalakkersuisunut apeqquteqaateqarputit. Apeqqutitit uannit akineqartussatut innersuunneqarput. Apeqqutitit matuma kinguliani ataasiakkaarlugit allanneqarput, akissummillu malitseqarlutik.

Postboks 909
3900 Nuuk
Tlf.: (+299) 34 50 00
E-mail: box909@nanoq.gl
Fax: (+299) 34 63 56
www.naalakkersuisut.gl

Apeqqut 1. Sermitsiami 28. Juni 2019 issuarneqarpoq Kalaallit Airports ilaatigut imatut: “[Ilulissani nutaamik mittarfiliornissap] Akisunerusinnaanera naatsorsuutigineqarsinnaammat ilumoorpoq. Qularnartoqarnerpaatinneqartoq tassaavoq Ilulissani nuna qeriuannartoq qanoq annertutigisooq assaanneqassanersoq.”

Taassama saniatigut oqaatigineqarpoq qillerinerit aamma seismiskimik sajuppillatsitsilluni misissuinerit tamakkiisuunnerat tamatumunnga tunuliaqutaasoq.

Inatsisartut 15. November 2018 pingajussaaneerlugu suliarisaanni imm. 21: “Nuummi aamma Ilulissani nunanit tamalaanit mittarfiit kiisalu Qaqortumi nunap immikkoortuani mittarfiup sananeqarnissaannut, ingerlanneqarnissaannut aningaasalersorneqarnissaannullu killiliussatut piumasaqaatit il.il..” tamannalu sioqqullugu Inatsisartut kiisalu avataaneersut suliamut attuumassuteqartut akornanni ilisimatitseqatigiinnerit pineranni saqqummiunneqartarsimangilaq Naalakkersuisut aamma/imaluunniit Kalaallit Airports A/S-ip Ilulissani mittarfiliornissamut atatillugu eqqumaffigigaat qularnartoqarnerpaatinneqartutut tikkuarneqartup mittarfiit sanaartorneqarnissaasa aningaasalersorneqarnerannut, pingaartumillu Ilulissani mittarfiliornissamut, ajornartorsiortitsilersinnaasoq nalornisoortitsisinnaasorluunniit.

- Naalakkersuisut uppernarsarsinnaavaat Inatsisartut 15. November 2018 sioqqullugu ilisimatinneqarsimangitsut Ilulissani mittarfiliornissamut tunngatillugu ajornartorsiutaalersinnaasut qulaani taaneqartut pillugit?
Akissut: Kalaallit Airports A/S-ip akisussaaffiisa iluini mittarfiliassanut suliniutit ineriartornerat pillugu Inatsisartut Aningaasaqarnermut Akileraartarnermullu ataatsimiititaliaa assigalugu, Naalakkersuisut ataavartumik ilisimatinneqartarput. Tamatumani Ilulissani mittarfiliassap pilersaarusiortigineqarnera, tassungalu atatillugu qularnartut ilanngullugit paasissutissiissutigineqartarput. Suliniutip allaaserineqarnerata pitsanngoriartuinnarnera ilutigalugu, aarlerinartut erseqqissarnissaat annikillisinneqarnissaallu Kalaallit Airports A/S-ip ataavartumik sulissutigaa.

Inuiaqatigiit aningaasaqarnerinut kingunissai pillugit naatsorsuutit kiisalu Kalaallit Airports A/S-ip sanaartornissami missingersuutai naapertorlugit aarlerinartut tamakkua naatsorsueriaatsini isumagineqarnerini, Naalakkersuisut XM2018/EM2018/21-mik suliarinninnerminnut atatillugu, periuseq tamanna pillugu Inatsisartut Aningaasaqarnermut Akileraartarnermullu ataatsimiititaliaa, Inatsisartullu ilisimatippai.

Inuiaqatigiit aningaasaqarnerinut kingunissai pillugit misissueqqissaarinerit saqqummiunneqartut, naatsorsuutigisamit allatut pisoqassagaluarpat kingunissai pillugit misissueqqissaarinerinik arlalinnik paasissutissartaqarput, matumani missingersuutit sipporlugit atuisoqassagaluarpat inuiaqatigiit aningaasaqarnerinut sunniutaasinnaasut ilanngullugit. Kalaallit Airports A/S-ip ingerlatsinermut aningaasalersuinermullu pilersaarutaani siullermi, missingersuutitigut sippueratarsinnaanerit sillimaffigineqarput, tamannalu Inatsisartut aalajangiinissaanni tunngavissani aamma tunngavigineqarnikuulluni.

Naalakkersuisut Kalaallit Airports A/S-imit maanna ilisimatinneqarput, Munck Gruppen A/S-imit inaarutaasumik isumaqatiginninniarnert maanna ingerlasut, tamannalu tunngavigalugu Ilulissani Nuummilu nutaanik mittarfiliortitsinissanut atatillugu sanaartortitsinissami aningaasaqarnikkut aarlerinarsinnaasut erseqqissiumaartut naatsorsuutigalugu.

Apeqqu 2. Naalakkersuisut uppersarsinnaavaat ulloq 15. November 2018 imm. 21-ip Inatsisartuni pingajussaaneerineqarneranni tunngavissat pisariaqartut tamaasa tunngavigalugit Inatsisartut aalajangiisimasut?

Akissut: Aap.

Apeqqu 3. Naalakkersuisut ulloq suna ilisimatinneqarpat pingaartumik Ilulissani mittarfissaq pillugu qularnartoqarnerpaatinneqartoq tassaasoq nuna qeruaannartoq qanoq annertutigisoq assaanneqassanersoq?

Akissut: Apeqqu 1-imut akissut takuuk.

Apeqqu 4. Ilisimasassaq taanna Naalakkersuisut tapersersortaannut qanga apuunneqarpa?

Akissut: Apeqqu 1-imut akissut takuuk.

Apeqqu 5. Nalornineq sivitsussagaluarpat Ilulissani mittarfissap piareernissaanut piffissaliussamut tamanna qanoq sunniuteqassava?

Akissut: Apeqqu 1-imut akissut takuuk.

Qularnartut taakkartorneqartup kingunerisaanik piffissaliussap kinguartinneqarsimaneranik, Naalakkersuisut Kalaallit Airports A/S-imit ilisimatinneqarnikuunngillat.

Neriuppunga qulaani allaqqasuni apeqquteqaatitit akineqartut.

Inussiarnersumik inuulluaqqusillunga


Karl Frederik Danielsen